



TEZAU LITURGIC

24 MAI

SLUJBA SOBORULUI SF. MILITARI



MOSCOVA, 2000



Служба Собору всех святых воинов

На велицей вечерни

На Господи воззвах: стихиры святым воинам,
глас 5:

Днесь вернии людие яко лучами солнечными
Крестом Господним просвещаются, / и силою
его на враги видимыя и невидимыя ополчаются;
/ днесь благочестивии царие и христолюбивии
воини Животворящему Кресту поклоняются / и
с сим Древом своя небесныя предстатели
прославляют: / О, святии воини, / вы бо
Орудием нашего спасения вооружишася, /
плоть, мира и диавола победили есте, / и тем
истиннии воини Христовы явились есте, //
молитесь непрестанно о душах наших.

Днесь православных народи светло празднуют, /
восхваляя сонм велий ратоборцев предивных, /
от лет древних и до ныне Христу угодивших, / и
от всех концов земных в Церкви яко звезды
небесныя возсиявших, / Веры Православныя
хранителей непреоборимых, / адаманта
надежды на Бога стражей неусыпных, / любви
жертвенныя вестников велегласных, / образа
благочестия явителей нелицемерных, //
неустанно молящихся о душах наших.

Днесь всепраздненственный день наста: /
 Церковь Русская память собора святых воинов
 Христовых совершает / и Русь Святая днесь
 торжествует, / в ней бо вся царства
 православная снисдошася, / и святые воины
 своя в щит и оружие ей предаша; / О святые
 Христовы воины, / будете приснии во бранех
 помощницы / благоверному Царю нашему и
 боголюбивому воинству Его, // и молитвенницы
 о душах наших.

Днесь Святая Русь духовне радуется / и с нею
 вся Церковь Православная веселится, / имеют
 бо защитники прекрепкия: / воины прехрабрыя
 и воеводы непобедимыя, / цари преславныя и
 князи предоблесныя; / имиже побеждаются
 царствия варварския / и обращаются в бегство
 полки чуждых, / имиже заграждаются уста
 зверообразных еретиков / и угашается сила огня
 зловерия и нечестия; / имиже и мы обретаем
 помощь противу козней бесовских и навет
 вражиих, // молятся бо присно о душах наших.

Слава, глас 5:

Русь Святая, / в тебе бо вся царства
 христианская во едино сочетаются / и угодники
 Божии от всех стран тобою присно воспеваются;
 / Граде избранный, / два убо Рима падоша, ты
 же стоиши, и иному по тебе не быти: / твое бо
 царство по глаголу Богослова ином не останется.

/ Благословено воинство Царя Небеснаго, / в тебе возсиявшее и тобою прославляемое; / егоже присным заступлением / блюди Веру Православную, / ею бо чаем Царства, / уготованнаго от сложения мира, // емуже не будет конца.

Вход. Прокимен дне. Чтения три.

Иисуса Навина чтение (6, 1-19):

И рече Господь ко Иисусу: се, Аз предаю тебе в руце Иерихон и царя его, и сущия в нем, сильны крепостию: и обходите град окрест вси мужие крепцыи единою (на день), тако сотворите шесть дний: и седмь жерцы да возмут седмь труб рожаных пред кивотом: и в седмый день обыдите град седмижды, и жерцы да вострубят в трубы рожаны: и будет егда вострубите трубою рожаною, внегда услышати вам глас трубы, да воскликнут вси людие: и воскликнувшим им, падут сами стены града во основании своем, и внидут вси людие устремившеся кийждо прямо себе во град. И вниде Иисус сын Навин к жерцем сынов израилевых и рече им глаголя: возмите кивот завета Господня, и седмь жерцы да возмут седмь труб рожаных пред лицем кивота Господня. И рече им глаголя: повелите людем обйти и окружити град, и воины да предыдут вооружени пред кивотом Господним.

И бысть егда рече Иисус к людем, и седмь жерцы имуще седмь труб священных да предыдут такожде пред Господем, и да вострубят доброголасно: и кивот завета Господня вслед по них да идет: воины же да предыдут напреди, и жерцы трубяще в трубы, и последующии создади кивота завета Господня бяху идуще и трубяще трубами. Людем же заповеда Иисус, глаголя: не вопите, ниже да слышит кто гласа вашего, ниже да изыдет из уст ваших слово до дне, в оньже повелю вам сам воскликнути, и тогда воскликните. И обшед кивот завета Божия окрест града (единою), абие иде в полк, и ста тамо. Во второй же день воста Иисус заутра, и воздвигоша жерцы кивот завета Господня. И жерцы седмь носящии седмь труб предыдаху пред кивотом Господним и трубиша трубами, и воины вооружени идяху, и прочии людие вслед кивота завета Господня идуще, и жерцы вострубиша трубами рожаными. И обыдоша град в день второй единою, и поидоша паки в полк: сие творяху шесть дний. И бысть в седмый день, воста в востание утреннее, и обыдоша град в той день седмижды. И бысть во обхождении седмем вострубиша жерцы трубами, и рече Иисус к сыном израилевым: воскликните, предаде бо Господь вам град: и будет град сей проклят, и вся, елика суть в нем,

Господу сил: токмо Раав блудницу снабдите ю, и вся, елика суть в дому ея, яко сокры прелагатаи, ихже посылахом: но вы соблюдайтеся от клятвы, да не когда помысливше вы возмете от клятвы, и сотворите полк сынов израилевых клятву, и потребите ны: золото же все и серебро, и медь и железо свято да будет Господу: в сокровище Господне да внесется. И вострубиша жерцы трубами: егда же услышаша людие глас трубный, воскликнуша вси купно людие гласом великим и сильным: и падоша вся стены града окрест, и внидоша вси людие во град, кийждо противу себе, и прияша град.

Царств первых чтение (1 Книга Царств 17, 1-51):

И собираша иноплеменницы полки своя на брань, и собращася в Сокхофе Иудейстем, и ополчишася среде Сокхофа и среди Азика во Афесдоммине. Саул же и мужие израилены собращася и ополчишася во удоли Теревинфа и устрояхуся на брань противу иноплеменником. И иноплеменницы стояху на горе отсюду особь, Израиль же стояше на горе отонуду, и удолю между ими быше. И изыде муж силен из полка иноплеменнича, имя ему Голиаф от Гефа, высота его шесть лакот и пядь: и шлем медян на главе его, и в броню кольчату той оболчен быше: и вес брони его пять тысящ сикль меди и

железа: и поножы медяны верху голений его, и щит медян на плечах его: и ратовище копия его аки орудие ткущих, и копие его шесть сот сикль железа: и носяй оружие его идяше пред ним. И ста и возопи пред полки израилевыми и рече им: почто изыдoste, ополчитися ли на брань противу нам? Несмь ли аз иноплеменник, вы же еврее Сауловы? Изберите себе мужа, и да снидет ко мне: и аще возможет со мною братися и одолеет ми, будем вам раби: аще же аз возмогу одолети ему, будете вы нам раби и поработаете нам. И рече иноплеменник: се, аз днесь уничижих полк израилев в сей день: дадите ми мужа, иже поборется со мною един. И слыша Саул и весь Израиль глаголы иноплеменничи сия и ужасошася и убояшася зело. Давид же Ефрафеев, сей бе от Вифлеема Иудина, имя же отцу его Иессей, емуже бе осмь сынов. Во дни же Сауловы бе муж той состареся в мужех. И идеша три сыны Иессеевы старейшии на брань с Саулом: имена же сынов его пошедших на брань, Елиав первородный его, и второй Аминадав, и третий Самма. Давид же бе юнейший, и три болшии его идеша вслед Саула. Давид же возвратився от Саула, отъиде пасти овцы отца своего в Вифлеем. И приходяше иноплеменник утро и в вечер, являясь пред Израилем чetyредесять дний. И рече Иессей

Давиду сыну своему: возми убо братиям твоим
меру ефи муки и десять хлеб сих, и иди в полк, и
даждь братиям твоим: и десять сыров от млека
сего, и даждь тысящнику: и братию свою посети
в мире, и еликих аще требуют, увеси,
субботствовать же будеши со мною. Саул же и
все людие бяху во удоли дуба ратующеся со
иноплеменники. И воста Давид рано, овцы же
остави со стражею, и взя, и отъиде, якоже
заповеда ему отец его Иессей: и прииде на
место, идеже исхождаху сильнии на брань и
вопияху в полцех. Занеже вооружашеся Израиль
противу иноплеменником, и иноплеменницы
вооружахуся противу Израиля. И положи Давид
бремя свое в руках стража, и тече в полк, и
пришед вопроши братию свою в мире.
Глаголющу же ему с ними, и се, муж месейский,
емуже имя Голиаф, филистимлянин от Гефы,
изыде от полков иноплеменничих и глагола по
словесем сим, и услыша Давид. И все мужие
израилевы егда увидеша мужа, и бежаша от
лица его и убояшася зело. И реша мужие
израильстии: видесте ли мужа сего восходяща,
яко поносить Израиля прииде? и аще будет муж,
иже убьет его, обогатит его царь богатством
велиим, и дщерь свою даст ему, и дом отца его
сотворит свободен во Израили. И рече Давид к
мужем стоящим с ним, глаголя: что сотворите

мужу, иже убьет иноплеменника онаго и отъимет поношение от Израиля? Яко кто есть иноплеменник необрезанный сей, иже поносит полку Бога Живаго? И рекоша ему людие по словеси сему, глаголюще: тако сотворится мужу, иже убьет его. И услыша Елиав брат его болший, внегда глаголати ему к мужем: и разгневался яростию Елиав на Давида и рече: почто сего пришел еси? И кому оставил еси малыя овцы оны в пустыни? Вем аз гордость твою и злобу сердца твоего, яко видения ради брани пришел еси. И рече Давид: что сотворих ныне? Несть ли речь? И отвратися от него ко иному и рече по словеси сему. И отвечаща ему людие по словеси прежнему. И слышаны быша глаголы, ихже глагола Давид, и возвестиша пред Саулом: и пояша его людие и приведоша его пред Саула. И рече Давид к Саулу: да не ужасается сердце господину моему о сем, раб твой пойдет и поборется со иноплеменником сим. И рече Саул к Давиду: не возможеши пойти ко иноплеменнику сему братися с ним, яко ты детищь еси, сей же муж борец есть от юности своея. И рече Давид к Саулу: егда пасяше раб твой отца своего стадо, и егда приходяше лев или медведица и восхищаше от стада овцу едину: и аз вслед его исхождах и поражах его, и исторгах из уст его (взятое): и аще

воспротивляшеся ми, то взем за гортань его, поражах и умерщвлях его: и льва и медведицу бияше раб твой, и будет иноплеменник необрезанный сей яко един от сих: не пойду ли, и поражу его, и отъиму днесь поношение от Израиля? Понеже кто необрезанный сей, иже уничижи полк Бога Жива? И рече Давид: Господь иже изъят мя от руки львовы и от руки медведицы, той измет мя от руки иноплеменника сего необрезаннаго. И рече Саул к Давиду: иди, и да будет Господь с тобою. И облече Саул Давида одеждею, и шлем медян возложи на главу его, и препояса Давида оружием своим верху одежды его. Давид же походив (во оружии) семо и овамо, утрудися, яко не обыче. И рече Давид Саулу: не могу ити в сих, яко не обыкох. И взяша от него сия. И взя палицу свою в руку свою, и избра себе пять камней гладких от потока, и вложи я в тоболоц пастырский егоже ношаше, и пращу свою имый в руке своей, и иде к мужу иноплеменнику. И идяше иноплеменник приближаяся к Давиду, иносяй оружие его пред ним (идяше). И виде Голиаф иноплеменник Давида и обезчествова его, зане той детищь бе, и чермен и леп очима. И рече иноплеменник к Давиду: еда пес аз есмь, яко ты идеши противу мене с палицею и камением? И рече Давид: ни, но и хуждший пса.

И прокля иноплеменник Давида боги своими. И рече иноплеменник к Давиду: гряди ко мне, и дам плоть твою птицам небесным и зверем земным. И рече Давид иноплеменнику: ты идеши на мя с мечем и с копием и щитом, аз же иду на тя во имя Господа Бога Саваофа, Бога ополчения Израилева, егоже ты уничижил еси: и днесь: и предаст тя Господь днесь в руце мои, и убью тя, и отъиму главу твою от тебе, и дам тело твоё и телеса полка иноплеменнича в день сей птицам небесным и зверем земным: и уразумеет вся земля, яко есть Господь Бог во Израили, и уразумеет весь сонм сей, яко не мечем ни копием спасает Господь, яко Господня брань, и предаст Господь вас в руки наша. И воста иноплеменник и иде во сретение Давиду. И ускори Давид и тече на сражение во сретение иноплеменнику. И простре Давид руку свою в тоболоц, и изъя из него камень един, (и вложи в пращу,) и верже пращею, и порази иноплеменника в чело его, и унзе камень под шлемом его в чело его, и паде (Голиаф) на лицы своем на землю. И укрепися Давид над иноплеменником пращею и камнем, и порази иноплеменника, и умертви его: оружия же не бе в руце Давидове. И тече скоро Давид, и ста над ним, и взя мечь его, и извлече его от недр его, и умертви его, и отсече им главу его. И видеша

иноплеменницы, яко умре сильный их, и бежаша.

Пророчества Исаиина чтение (Ис. 43, 9-14):

Вси языцы собращася вкупе, и соберутся князи от них. Кто возвестит сия? Или яже исперва кто возвестит вам? Да приведут свидетели своя и оправдятся, и да услышат и да рекут истину. Будите ми свидетелие, и аз свидетель, глаголет Господь Бог, и Отрок Мой, егоже избрах, да увесте и веруете ми и уразумеете, яко Аз есмь: прежде Мене не бысть ин бог, и по мне не будет. Аз Бог, и несть разве Мене спасаяй. Аз возвестих и спасох, укорих, и не бе в вас чуждий: вы мне свидетелие, и Аз свидетель, глаголет Господь Бог, еще от начала, и несть изымаяй от руку Моею: сотворю, и кто отвратит е? Тако глаголет Господь Бог, избавляяй вас, Святый Израилев.

На литии стихиры святых воинов, глас 5:

Радуйтесь, боголюбивии воины Христовы, / тесным путем доброделания прошедшии, / Православныя Веры защитницы, / царей благочестивых поборницы; / молитесь ко Господу // даровати душам нашим мир и велию милость.

Любы истовыя явители, / возвеселитесь благоразумнии други Христа Бога нашего, /

воины святии, / Триипостасного Божества
вечныя трапезы сопричастницы, // молящися
о душах наших.

Царствие Божие, в силе пришедшее, /
восприяли есте в душах своих, / вои
богомудрии, / доблестию и страхом Божиим //
и верностью Христу Богу нашему.

Ины стихиры, глас 2:

Веселися, Невесто Христова, Церкви Святая, /
наста бо день торжества славнаго, / Христос
воскресе и сокруши врата адовы, / Воевода
славных воинов, / положивших в житии своем
основание // в Сем Жизнодавце.

Благодать Божия / днесь щедро изливается в
Церкви Православней / от светильников любви
присныя / препоясанных крепостию смирения
// воинов Христовых.

Слава, глас 5:

Приидите, российстии собори, / царие и князи и
вси людие, / прославим святых воины Царя
Небеснаго, / аще бо и земнороднии беша, / но
ангельскаго достоинства причастницы явишася,
/ о жизни временней небрегоша, / и страданьми
непреходящая славы сподобишася. / Ихже
молитвами, Господи, / и нас сопричти в
Небесное воинство // и спаси землю Русскую.

И ныне, глас тойже:

Приидите российстии людие / помазанием Духа
в воины Христовы избранныя, / стецемся
усердно со святыми вои Царя Небеснаго, / со
архангелы и ангелы и всеми вышними силами /
прославить Вбранную Воеводу, Богородицу
Пречистую, // Державную Владычицу земли
Русския.

**На стиховне стихиры воскресные
прилучившегося гласа.**

Слава, святых, глас 2.

Подобен: ДOME Евфрафов:

Земле Русская, / граде возлюбленный /
утверждай твой стан, / в немже в конец времен
вернии / обрящут пристанище, // святыми
воины ограждаеми.

И ныне, Богородичен, глас тойже:

ДOME Пречистыя, / уделе благословенный, / Русь
Святая, / храни Веру Православную, // в ней
же тебе утверждение.

По Трисвятом Богородице Дево: единожды,

тропарь праздника единожды, глас 1:

Спаси, Господи, люди Твоя и благослови
достояние Твое, победы благоверному Царю
нашему на сопротивныя даруя, и Твое сохраняя
Крестом Твоим жительство.

И тропарь святых воинов единожды, глас 5:

Сонм святых воин добропобедных, /
благословенно воинство Царя Небеснаго /
воспоим вернии и прославим, / прием бо вся
оружия Божия и оболкшеся в броня правды, /
победиша славно полки враг видимых и
невидимых, / утвердиша Царство Православное,
/ Церковь же Христову просветиша зарями
тмочисленными, / темже молим Христа Бога //
тех молитвами спасти души наша.

На утрне

**На Бог Господь: тропарь воскресен гласа,
дважды. Слава, тропарь святых воинов. И ныне,
тропарь праздника.**

Величание святым воинам:

Величаем Вас, / святии воины Христоименитии,
/ Церкви Святыя украшение, / Царства
Православного утверждение // и молитвенницы
о душах наших.

Псалом избранный: Бог нам прибежище и сила:

Седальны святых воинов по полиелее, глас 1:

Стояще во храме Господни, / во дворех дому
Бога нашего, / хвалите имя Всеславнаго и
Предивнаго во святых Своих, / превозносите,
людие, вочеловечшагося Господа, /
даровавшему людем Своим таковых
молитвенников, / души наша озаряющих светом

благочестия / доблестию во бранех и верою истинною сияющих святых воинов, / и сердца наша движущих к славословию Живоначальныя Троицы.

Слава и ныне, праздника, глас 7:

Церковь вопиет Ти, Христе Боже, в певге и кедре и кипарисе, покланяющиеся Тебе: победы Императору Богородицею даруй, помилуй нас.

Аще храм святых воин:

Прокимен, глас 4: Святым, иже суть на земли Его, / удиви Господь вся хотения Своя в них

Стих: Сохрани мя Господи, яко на Тя уповах.

Евангелие святым воинам: от Иоанна, 51 зачало.

Канон воскресный гласа на 4, Богородице на 2, праздника на 2 и святых на 6.

Канон святых, глас 8.

Песнь 1

Ирмос: Воду прошед, яко сушу, и египетского зла избежав, израильтянин вопияше:

Избавителю и Богу нашему поим.

Припев: Все святии воины, молитесь Бога о нас.

Похвальное пение сподоби нас, Господи, воспеть святым Твоим воинам, положшим душу свою Тебе ради и Евангелия и спасшим ю.

Отверзите уста наша немощная, да по достоянию величати вас возможем, дивнии и всепетии воины, молитвами вашими от лютых

спасаемии.

От всех родов и племен земных избра вас
Господь, преславнии воины, яко бисер
многоценен, во свидетельство спасения
народом.

Христа Господа присно молитесь, богоизбранный
соборе, да милостию Своею сохранит род
христианский и от тяжких и лютых спасет люди
православныя.

В земнем житии своем, воины всехвальнии,
друзи своя от супостат сохраняши, тако и ныне
вашим предстательством пред престолом Царя
Небеснаго спасайте ны.

Богородичен: Воспевающе песни молебныя, к
Тебе прибегаем, о Мати Всепетая. Ты же, яко
Владычица Державная, от тяжких и лютых нас
спаси.

Катавасия: Крест начертая:

Песнь 3

Ирмос: Небеснаго круга верхотворче Господи, и
Церкве Зиждителю, Ты, мене утверди в любви
Твоей, желаний краю, верных утверждение,
Едине Человеколюбие.

Ангельских чинов сопричастницы, от всех
сословий возсиявшии и Христу угодившии,
Церкве Святыя будете щит непрободим и
забрало крепкое, да Ею выну во

Православии утверждаемся.

Небесных воинств сомолитвенницы, всеславнии
угодницы Божии, о благоверном Царе нашем и
воинстве Его христолюбивом
предстательствуйте присно и во Православии ны
утверждайте.

Личе избранных воинов Господних, у Престола
Божия предстоящи, молитесь ко Господу, да от
бед сохранит люди Своя и во Православии
землю Русскую утвердит.

Угодницы Христовы всепетии, кровию своею
любовь к Богу запечатлевши, молитвами
вашими неоторимы ны во Православии
утвердите.

Сонме воин святых, безплотных подражателие и
Веры Истинныя поборницы, научите и нас
добродетели вашея, во еже во Православии нам
утвердиться.

Богородичен: Покров Твой, Мати Дево,
воспевающе, имже от злых избавление прияхом,
Тя присно молим во Православии ны
недвижимы утвердити.

Кондак праздника, глас 4:

Вознесыйся на Крест волею, тезоименитому
Твоему новому жительству щедроты Твоя даруй,
Христе Боже, возвесели силою Твоею
Благоверного Царя нашего, победы дая Ему на

сопостаты, пособие имущу Твое, оружие мира
непобедимую победу.

Икос праздника:

Иже до третияго небесе восхищен бысть в рай, и
глаголы слышав неизреченныя и божественныя,
ихже не леть языки человеческими глаголати,
что Галатом пишет, яко рачителие писаний
прочтосте и познасте: мне, глаголет, хвалитися
да не будет, токмо во едином Кресте Господни,
на немже страдав, уби страсти. Того убо и мы
известно да держим, Крест Господень, хвалу
вси: есть бо нам спасительное сие Древо, оружие
мира, непобедимая победа.

Кондак святых, глас 2:

Доблии воины Иисус Христовы, / вернии друзи
Божии, / не обязастеся куплями житейскими, /
Воеводе же Возбранному преславно угодили
есте, / душу свою положиша за други своя, /
темже пред Престолом Господа славы
предстояще, / молитв Его о еже спастися нам.

Икос святых:

Память собора святых воинов совершающе, /
боголепными песньми прославим Святаго
Утешителя Духа, / помазавшаго вас, воины
Христовы, помазанием истинным / в нем же
пребыли есте непреложно. / Сего ради Господа

песнословяще, / ублажаем вас, предстателие
наши крепции: / Радуйтесь, Церкви Христовы
ограждение; / радуйтесь, Царства
Православнаго утверждение. / Радуйтесь,
благочестивому Царю нашему на варвары
одоление; / радуйтесь, христолюбивому
воинству Его во бранех вспоможение. /
Радуйтесь, приснии ходатаи о чтущих вас; /
радуйтесь, неусыпные хранители воспевающих
вас. / Радуйтесь, супостат видимых
прогонитилие; радуйтесь демонов невидимых
посрамителие; / молитесь непрестанно о еже
спастися нам.

Седален святых, глас 2:

Моление теплое принесите, прехвальнии, / ко
Всемилоствому Богу Спасу нашему, / о граде и
отечестве нашем предстательствующе; / от
всякаго зла сохраните чада ваша / и от бед
всяческих избавите, / небеснии заступницы
наши.

Слава и ныне, праздника, глас 1.

Подобен: Лик Ангельский:

Оружие Креста во бранех показася некогда
благочестивому царю Константину, непобедимая
победа на враги, веры ради. Сего трепещут
противныя силы, сие бысть и верных спасение,
и Павлова хвала.

Песнь 4

Ирмос: Услышах, Господи, смотрение Твоего таинства, разумех дела Твоя, и прославих Твое Божество.

Величая сонм святых воин Христовых, первых восхвалим праведных Иисуса Навина, Гедеона, Давида царя и прочих ветхозаветных ратоборцев, научающих нас ревности по Единому Богу, и с ними да воспоем: слава силе Твоей, Господи.

Руце присно ко Господу воздевающе, мученицы первии Лонгине и Корнилие сотницы, молитесь, да познают Бога, пришедшаго во плоти, неведящие Его, и с нами да воззовут: слава силе Твоей, Господи.

Великомученицы славнии, Георгие Победоносче, Димитрие Мироточце и Никито победы тезоимените, благочестивейшаго Царя нашего и воев Его во бранех сохраните и победы Ему на враги испросите, да в умилении взываем: слава силе Твоей, Господи.

Исцеление испросите нам, добропобеднии Мино, Прокопие и Меркурие, елеем молитв ваших сердца наша от ран греховных врачующе, да Христу Спасу песнь вопием немолчно: слава силе Твоей, Господи.

Небесному Престолу предстояния и нас сподобите молитвами вашими, Феодоре

Стратилате и Феодоре Тироне со Евстафием и Артемием достоблаженными, да купно с вами во веки воспоем: слава силе Твоей, Господи.

Богородичен: Отца Превечнаго Слове Собезначальне, Матере Твоея молитвами спаси люди Твоя и благослови достояние Твое, и купно со святыми воины пети сподоби: слава силе Твоей, Господи.

Песнь 5

Ирмос: Просвети нас повелении Твоими, Господи, и мышцею Твоею высокою Твой мир подаждь нам, Человеколюбче.

Грехи наша очиститите и страсти наша исцелите, мученицы Иоанне Воине, Акакие и Уаре, да увенчает и нас Господь во Царствии Своем, великоименити светильницы Церкви Земныя и Небесныя.

Шуйяго стояния на страшнем судищи Христове избавите ны, доблестю славнии чотыредесять мучеников Севастийских, и десныя страны причтения вашими молитвами сподобите, светильницы Церкви Земныя и Небесныя.

Умилостивите Господа о нас, во мраце греховнем погибающих и светом богопознания осветите сердца наша, Савво, Андрее и Мелетие, Стратилаты Господни, песни похвальная вам вопиющих, о преславнии светильницы Церкви

Земныя и Небесныя.

В суете дний утренюем вам, воеводы Христовы, всеславнии, мученицы Аморийския, Света Невечерняго зрения и нас сподобите и Правдою вечною сердца наша осияйте, преславнии светильницы Церкви Земныя и Небесныя.

В бедах и напастех на помощь нам ускорайте, мучениче Маврикие со всеми ратники святыми, мученическим венцем от Христа увенчанными, вы бо воистинну явистесь светильницы Церкви Земныя и Небесныя.

Богородичен: О Всепетая Дево Владычице, пощади чада Твоя, спаси нас молитвами Твоими, предстояще Престолу Божию, Взбранная Воеводо непобедимого воинства Царя Небесного.

Песнь 6

Ирмос: Молитву пролию ко Господу и Тому возведу печали моя, яко зол душа моя исполнися и живот мой аду приближися, и молюся яко Иона: от тли, Боже, возведи мя.

Отвергше ратное служение языческому царю, Анастасие Персянине, иноческаго жития взыскал еси, и яко истинный воин Христов мученическаго венца сподобился еси, помози и нам отвергнуть служение языческое, да с тобою Господа величаем.

Яко ангелом на земли уподобилися есте, преподобнии Александре, Далмате и Петре Афонский, брань противу крови и плоти сменившия на брань противу духов злобы поднебесных, темже избавите и нас от козней бесовских, да выну Господа величаем.

Ублажаем вас, преподобнии Илие Муромче и Тите воине, Печерстии чудотворцы, к подвигу телесному и духовному нас подвизающийи, сего ради из глубины неведения изведите нас, да с горними лики купно Господа величаем.

Небесныя чертоги наследити молитвами вашими нас сподобите, воины преподобнии Александре Пересвете и Андрее Ослябе, по духовней брани противу агарян в помощь благоверному князю Димитрию споборшии, да предстательством вашим спасении, присно Господа величаем.

Вемы вас, святии воины, не токмо врагов видимых храбрых прогонителей, но и демонов неустрашимых победителей, и молим вас: просветите зарями Евангельскаго света не вечерняго сердца всех поющих вас, да присно Господа величаем.

Богородичен: Мати Божия, Всеславная, Царице Небесная, страстьми и грехи обуреваемых, милостию Твоею защити, да от злых избавлении, Покров Твой выну величаем.

Кондак и икос воскресен.

Песнь 7

Ирмос: От Иудеи дошедше отроцы, в Вавилоне иногда, верою Троическою пламень пещный попраша, поюще: отцев Боже, благословен еси.

Велицыи всем христианом предстатели явистесь святии царие Константине Равноапостольне, Феодосие Великий, Маркиане и Иустиниане Богомудрии, наипаче царем православным в подвиге ратном и правлении державном, воспевающим с вами: отцев и наш Боже, благословен еси.

Не возможем исчислити победы ваша, благовернии Маврикие и Никифоре, в царской порфире иноческий образ воздержания явившия, и мученическия кончины сподобившияся, будите и нам противу агарян видимых и невидимых споборницы, да с вами поем: отцев и наш Боже, благословен еси.

Восхвалим вси равноапостольнаго великаго князя Владимира, Солнце Красное земли нашея, вои своя и весь народ Русский в Небесное воинство предводяй и яко воин Христов с небесными вои пребываяй, идеже воспевае присно: отцев и наш Боже, благословен еси.

Возвеличим подвиг благовернаго князя нашего Александра Невского, неустрашимаго ратоборца

противу богопротивных латинян, приснаго защитника земли Русския, мудраго правителя и обидимых заступника, да житие его и подвиги во образ приимше, ко Господу шествуем непреткновенно, выну поюще: отцев и наш Боже, благословен еси.

Святии благовернии Андрее, Данииле, Димитрие, Михаиле, Олеже со всеми святыми князи и цари, в земли Российстей просиявшими, сохраняйте достояние Христово, и наследником вашим, благоверным царем нашим, будете во бранех и правлении наставницы, да вси поем: отцев и наш Боже, благословен еси.

Богородичен: Пречистая Дево Богородице, удел Твой сохрани от всякаго злаго обстояния, ограждая землю Русскую, Сына Твоего знамение носящую, от нашествия иноплеменник и междоусобных брани, да непрестанно взывает: отцев и наш Боже, благословен еси.

Песнь 8

Ирмос: Царя Небеснаго, Егоже поют воинангельстии, хвалите и превозносите во вся веки.

Непобедимии в ратех явистесь, праведнии воины Феодоре и Александре, архистратизи Державы Российския, : ов на мори, ов убо на земли, но в едином к славе Божьей, царей православных и воинства русскаго

потрудитесь, тако и молитвенницы усерднии к Богу пребыли есте, научая нас Господа воспевати во вся веки.

Огнем любви Божественныя распляеми, воины мученицы Меркурие Смоленский и Евгение Новый, положиша души своя за Веру Истинную, и прославили еста землю Русскую, и подвигом вашим безбоязненным со всеми святыми вои земли Русския воздвизаета нас Господа воспевати во вся веки.

Прославим мученика Гоброна, царя Давида и всех святых воин и воевод земли Иверския, от лет древних в ней возсиявших и Веру Истинную в ней соблюдавших, и научающих православныя народы в любви друг ко другу единым сердцем и едиными усты Господа воспевати во вся веки.

Подвиги вашими, яко всесветлыми лучами освещаемы, боголюбивии князие Владиславе, Лазаре, Бояне, Борисе, Вячеславе и вси святии воины в Сербии, Болгарии и инех словенских странах Богу угодившия, прославляем вас, к единомыслию словенския народы призывающия, купно Господа воспевати во вся веки.

Нечестия и предательства в сердце свое не прия, святыи царю мучениче Николае, на голгофу Русскую возшел еси купно с супружицею и чадами, сонм новых мученик Российских

венчая, и всех людей земли Русския призывая:
О, чада моя возлюбленная, последуйте ми, якоже
аз Христу, да сподобит и вы с вои Своими
воспевати Его во вся веки!

Богородичен: Истовых молитв просити дерзаем,
Владычице, пред Сыном Твоим и Богом нашим,
Мати Всепетая, благодатию укрепляеми, песни
Тебе молебныя приносим и милость Твою
просим: о, Державная Владычице наша, спаси
землю Русскую, да воспеваеТя во вся веки.

Песнь 9

Ирмос: Воистинну Богородицу Тя исповедуем,
спасеннии Тобою, Дево Чистая, с безплотными
лики Тя величающе.

Мужественнии в доблести воины Христовы, во
всех языцех Свет Истинныя Веры явившия,
Господа присно молитесь от всякаго зла сохранить
и во Православии утвердити чада ваша
духовная.

Мира благодетели, ангели земнии и
человецы Небеснии, звезды всесветлыя неба
церковнаго, похвалы наша примите, воины
святии, и во Православии утвердите чада ваша
духовная.

Истиннаго живота Царствия Христова
сопричастницы и нас быти сподобите, стражи
благочестия, воины славнии, граждане

Иерусалима Горняго, и к Небеси путевожди
явитесь чадом вашим духовным.

Ризы своя убелившия кровию Агнца
Божественнаго, соборе предивный и всепетый
воинов Царя Небеснаго, молитвами вашими
одеяние душ наших просветите и Господню
славу пети сподобите чада ваша духовная.

Воеводою грозным, Архистратигом Михаилом,
на брань водимые, святии воины, отгоняйте с
ним и со всеми небесными воинствы архангел и
ангел, враги наша видимыя и невидимая, и
сохраняйте достояние Христова, Русь Святую, и
чада ваша духовная.

Богородичен: Архангельский глас радостно
приемшая, Русь Святую, Дом Твой от всякаго
зла сохрани, и мучений вечных избави рабы
Твоя, Богородице Дево, и Царствия Небеснаго
причастники быти сподоби, да милость Твою
воспеваем купно со всеми святыми воины во
веки веков!

Ексапостиларий воскресен.

Слава, святых воинов:

В песнех восхвалим светила незаходимая, полк
светоносен Царя Небеснаго, воинов
непобедимых, Христа славяще, сих
просветившаго и укрепившаго, и во бранех

помощники благоверному Царю нашему даровавшего.

И ныне, светилен праздника:

Крест хранитель всея вселенныя, Крест красота Церкви, Крест царей держава, Крест верных утверждение, Крест Ангелов слава и демонов язва.

На хвалитех стихиры на 8, воскресны 3 и праздника 3

Таже святых воинов, глас 8:

Стих: Господь крепость людем Своим даст, Господь благословит люди Своя миром.

О, воины славнии, достоблаженнии светильницы! / Подвиги и чудесы своими озарили есте вси концы земнии / и осияли верных сердца. / Песнословят вас днесь православных собори, / сликовствуют вам Силы Небеснии, / во святых дивному Богу славословие приносяще. / Их же предстательством, Щедре, / утверди нас в Вере // и спаси души наша.

Стих: Принесите Господеви сынове Божии, принесите Господеви, сыны овни.

О, богоявленный воинов соборе! / Днесь на похвалу вашу сошедшеся, / паки воспомянуша житие и подвиги ваша, / душами умилимся и возрадуемся, / и песни достолепно воспоим, / и

возвеличим память вашу! / О, боголюбезнии
защитницы Веры Православныя! / Вознесите ко
Христу Богу молитву, / да утвердит во
благочестии землю Русскую до скончания века
// и спасет души наша.

Слава:

О, христолюбивых воинов сонме! / Днесъ
праздник ваш совершающе, / просвещаемся
благодатию Всесвятаго Духа, / укрепившаго вас
в подвиге ратнем, / положить души своя за
Веру, Царя и Отечество, / веселимся и мили ся
деем, / таковых предстателей имуще! / О,
богоугоднии защитницы Царства
Православнаго! / Вознесите ко Господу Богу
молитву, / да утвердит скиптр благовернаго
Царя нашего до скончания века // и спасет
души наша.

И ныне: Препоблагословенна еси:

По отпусте Слава и ныне: стихира Евангельская.

На литургии

Блаженны праздника на 6, и святых воинов, песнь 7-я на
4.Прокимен Недели по Воздвижении и святых
воинов.Прокимен воинов, глас 3: Господь просвещение мое и
Спаситель мой, / кого убоюсь?Аллилуиарий Недели по
Воздвижении и воскресный.
Апостол и Евангелие Недели по Воздвижении и дня, святых
воинов: ко Ефесеем, 233 зачало, от Матфея, 38 зачало.